

福建通志

第柒拾柒册
共壹百册

福建循吏傳卷四

明一

閩縣

許原明初以諸生薦受定海縣丞歲修治海舟官直或不時給或已給爲吏欺隱故事縣有興作責民一二人主出納謂之庫子所費皆令代輸而促迫之歲弊民產數十家原惻然詣府請其直集里役分授之縣以業海爲生自禁民船出海所恃者田租而里役無藝原令受役準田多少民便之攝知慈谿縣值旱禱白龍潭不應察豪惡吏素爲民患者大書其背曰天不雨此屬爲之也民見之大快雨隨至被議去民老幼號泣送者千人人懷一金悉謝遣無所受既事白乃還尋以父憂歸

郭柏洪武初任壺關縣丞嘗鑿惠澤池於南關民賴之

陳肅初名大觀字文叔洪武四年以孝弟力田薦太祖喜其容止魁異爲改今名除淮安知府先是盜竊府藏捕弗獲守者皆繫獄肅至似有神啟

潛伺果得之明年淮安有諸生錢受祿詣闕奏事帝問淮上何官能體朕心對曰惟一知府陳肅即召赴闕擢四川按察使令民毋火葬官給之地父母在者勿異庖婦人勿預訟居二年復徵入朝超拜禮部尚書命下而卒

趙景純初名明景純其字洪武間以國子生擢雲南道御史忤旨奪職爲民更名李潛隱於閩清會大赦乃以字爲名尋被薦爲閩清訓導永樂初擢知上饒縣廉介不避權要正風俗革吏弊均賦役息盜賊三載卒於官檢筭中僅餘白金一兩邑人立祠祀焉

趙彥剛洪武間知萬安縣興學勸農均賦役革吏蠹民有訟立與剖決邑西南寇起親勦撫之代去行李蕭然

林眞字汝實永樂乙酉舉人以楊榮薦選庶吉士入經筵侍書出知慈谿縣改補江寧縣上書言時事成祖嘉納再移宜興獲妖賊龔伯諒詞連無辜辨釋八十餘人卒於官

葉光永樂初以明經薦授南海主簿莅政之初凡事遜之於尹及攝邑篆以廉明稱吏不敢欺民咸歌曰南海簿真不貪百鳥鳳人中難

林元美名鏐以字行父觀字用賓洪武中隱居不仕性厚而直鄉人化之皆往求質元美登永樂辛丑進士宣德中授上猶知縣縣土田磽瘠賦稅多逋元美爲請於朝核其田汙萊者悉蠲之邑鮮知學集諸生親爲講論科第始顯山峽中多盜撫以恩信皆向化正統中遷知海寧州州舊置兩軍衛守禦海寇武弁習爲暴元美密條其不法以聞下臺憲繩治有二僧自他州至以術惑衆執之熟視曰此越獄盜也訊之果然人以爲神天順初擢撫州知府二年致仕歸友人戴宏齡方嚴慎許可對客握元美手曰公有四知諸公知乎歷官知縣知州知府人皆能之至其知足人鮮能也子瀚自有傳

黃寧宣德間爲奉化縣丞參政俞士悅以清軍至縣見其冊籍整敘大加稱賞布式諸郡

周恂正統中爲雲和縣丞聞寇入境統兵民勦絕之

張濬字哲之天順己卯舉人授寧國教諭成化中移四會適有海寇濬以策上總兵官陳銳銳不能用十六年擢饒平知縣修教令興學校有斗老謝全者頑梗亂政濬以計捕殺之縣人大悅斗老者言其科取人莫敢誰何也會廣寇充斥督府識其先嘗上策總兵檄領揭陽四邑兵禦之賊平功未及錄而全子訟當道濬不自白鬱惋病疽卒民祀之名宦祠

王俊字世英成化丙戌進士授南京戶部主事出知袁州府風采嚴整凡豪家武斷者一繩以法修學宮濬水利皆爲袁人遠計九載遷廣東參政撫化猺獞廣人德之

黃寯字世用成化丙戌進士歷知武寧當塗江山三縣撫字盡心在武寧時有鈎致流屍折其脅誣爲仇家所毆官久不能辨寯視之曰骨爲毆傷何以從內折外耶誣者遂服陞工部主事改戶部以不合上官歸

鄧拱字宏中祖光字景晦時鄉曲有三患浮屠寺占中達病民出入沿山

田剛燥艱於耕犁山麓溪春常奔決壞民田廬光謀於眾相隙地徙寺渠已田以通水利復築長隄以障狂潦三患並除珙登成化丙戌進士授常熟知縣邑有巨豪馬凱每一令至即以厚資相結納恣爲暴橫珙廉其罪狀箠殺之都御史畢亨疏其賢入爲戶部郎官終貴州參議

鄭琳字文王成化戊子舉人知象山縣權貴不敢干以私時人呼爲鄭硬頭孫逯字世美嘉靖庚戌進士官江西按察司僉事綽有祖風時權相嚴嵩奪民漑田湖塘民訴於逯逯命各荷鍤以從羣共開掘頃刻還民高怒甚人皆爲逯危未幾嵩敗逯得無恙遷廣東布政司右參議

郭珙字元珪成化乙未進士知會稽縣有大豪撓法害閭里珙至召數其罪案以法邑大水饑不待關白即發廩賑乃鑿塘泄水以備旱澇移知秀水訪求民隱而興革之時有郭天堂之謠入爲戶部主事卒子軒字瞻夫讀書通大義敦族恤窮遺貲悉推諸弟妹有弟傲弗率軒逾篤愛之再從弟麟幼孤軒延師督訓後麟入仕軒子波字澄卿正德丁丑進士知長洲

縣初至尚嚴猛巨室無不斂手嘉靖初織造太監張志聰恣睢橫索波持
法挫之志聰忿甚誣波撓御造龍衣擁徒執而倒曳之車後百姓憤曰令
爲民受窘辱至此相率奪波去持瓦石擲志聰志聰入奏帝命械繫波下
鎮撫司獄南京都御史吳廷舉疏言志聰貪黷狀帝乃降波五秩黜志聰
罷之時波已擢都水主事降江西布政司照磨後除蕭山知縣

鄒蘊中字德輝成化庚子舉人弘治中除石首教諭多所造就遷貴池知
縣與上官議獄弗合拂衣歸家居夫婦織席爲食有門生以御史按閩屢
候弗見也一指揮持厚賄丐關說御史求善地蘊中曰此言胡爲及我哉
強之再三蘊中呼里人欲執詣官指揮乃告實曰御史念公貧藉此爲餽
耳終不納

李廷儀字鳴鳳弘治庚戌進士授定海知縣遷順天府通判外戚奪民田
廷儀爲直其事坐謫六安州同知賑屬邑霍山饑全活甚衆擢江西南安
府同知南安號嚴郡賊阻山谷時出剽掠廷儀募能走險者帥之進討俘

斬五百餘降渠魁陳能白等數千人督府攘其功廷儀恥于自言遂引疾歸

鄭濬字克明弘治壬戌進士知常熟縣摧強植善民號神君累擢高州知府亦有善政去官時民爭留之從弟瀛字克達正德己卯舉人官鳳陽府懷遠知縣博學有文名

藍淦字德源正德己卯舉人嘉靖十一年爲九江府湖口知縣以課士勸農爲務嘗夜半微行見二婦人績久而饑計家中無可爲食獨有酒一罌兩婦議存其清者飲客至底無濁歎曰是酒一清徹底好似藍使君竟不飲翼日遣人厚賜兩婦勞之曰績至夜分勤也飲濁存清禮也無濁而終不飲儉也以婦人而知賢其上義也巡按御史至立清廉貪酷四表令屬吏自揣其行立何位次淦攝衣直趨廉字御史曰藍吏之賢尚不止此當更進一步卽以第一薦之遷去民爲作去思亭

鄧遷字世喬嘉靖戊子舉人知香山縣下車卽峻繩里胥贄餽一邑肅然

治後仁山爲豪占贖歸建書院暇則與諸生講學其中奉檄勘新會豪民所占田歸預備倉縣多寄莊另立順德新會等都推才幹一人爲領袖賦役盡完擢嘉興府通判署嘉善有築城功

陳子文字在中嘉靖己丑進士授麻城知縣訟者一見輒能記其姓名里居雖老吏猾胥不能舞文取一錢歷戶部郎出知長沙府巨盜尹大憲阻山環水爲寨有捕者輒鳴鼓隔水相拒歷數郡守莫能除子文至故緩之偵知賊畜犢甚多時竊出交易乃伏壯士數十人水旁一人託買犢往誘其魁出伏發禽之改知池州府諸生願請業者親與講明經義遷湖廣按察副使剿撫諸苗以勞卒於官從孫堯欽字仲敬萬曆癸酉舉人歷漢陽知縣桂林同知亦著廉聲

王子聰字汝達嘉靖甲午舉人知於潛縣大盜鮑邈邇等據天目山子聰斬獲二百餘人御史舒汀薦治行第一以艱去再補景寧治如於潛兩邑人並祀之子夢麟字維振隆慶庚午舉人任吉安府通判郡多臚仕夢麟

執法不少徇遷廣州府積羨餘鹽課六萬緡請蠲民間糧十萬餘石歷永州桂林府以病請歸夢麟父歿遺四弟貧且穉授徒哺之讓宅於弟自儉儆祠以居及歷官俸資悉散諸弟

鄭銘字曰新嘉靖丁未進士除太平知縣擢戶部主事歷郎中出知溫州府倭寇數萬猝至銘乘城守遂塞要害編丁男爲什伍身當其銳晝夜不交睫者月餘賊乃退無何罷官郡人肖像祀之

鄭日休字廷德嘉靖甲子舉人除海寧教諭士以非公溷有司者召而訶之或遭枉必力爲白擢惠州推官持法平允攝博羅縣清稅弊蘇民力以丈量勞悴卒於官日休計偕時友人林世和卒京師爲歸其喪以女女其子又嘗爲族人贖所鬻女而嫁之

趙鉞嘉靖末知普寧縣縣治初設鉞單車之任不攜妻子戢盜安民三年邑大治攝增城令惠政有加

李柱字子石萬曆癸酉舉人爲浦城教諭遷馬湖推官摘伏如神讞鞫多

所平反嘗捐俸贖民罪一日出獄者四十餘人未幾以人言罷歸

葉公聖字達所萬曆戊子舉人授南靖教諭時縣治新遷學宮草創公聖課士維嚴教條整肅士喜得師後陞廣西賀縣知縣

高士奇字懋正萬曆甲午舉人知宿州河決濉水民懸釜炊士奇親詢民疾苦給以牛種先是戶口多亡逋賦以千計士奇招徠復業徵漸如額州豪持吏長短士奇繩以法減死論戍諸豪相戒毋敢犯改知萬州卒

陳兆榮字仁夫改名美萬曆庚子舉人除鹽城知縣縣有草場三千餘畝故例每竈戶人給七畝其餘聽貧民樵採後竈戶日強悉爲吞噬有樵至者羣毆之美至復其初縣患海潮溢美造石門以禦潮山東大饑流民數萬至縣美開倉設飯廠三十六所而自督之歲除猶未歸署也遷深州知州

葉良漸字海濤萬曆壬子舉人補南直隸靖江知縣自題廳事云心清祇有松堪對門靜兼無雀可羅隆武初徵爲戶部主事擢員外郎鼎革後杜

門不出

蘇夢暘萬曆間爲南京司獄戢獄卒不使患苦諸囚又恐其夜虐之莫之知也則監懸一銅鉦令曰有虐囚者鳴此獄中肅然其他踐更稽察撫卹病苦法甚備未幾轉廣東吏目

侯官縣

林瑛字玉成洪武庚戌舉於鄉授保寧府通判攝府事乃頒呂氏鄉約條規於郡縣學立爲勸懲格期以必行每巡歷屬邑必詢察父老鄉約舉廢謂民曰盜賊之起由教化之不行也教化行而俗美盜何從起

高昊字汝大洪武末以貢入太學出知常山縣縣大猾出入官署伺隙持短長爲姦利前令莫敢誰何昊曰此不去何以爲治即按致其罪當死因被反噬逮至京得白而羣不逞之徒日夜媒孽其短昊歎曰曾參非殺人者然告者屢至雖其母亦惑焉即謝病歸

鄭珞字希玉永樂乙未進士選庶吉士改刑部主事宣德初重郡守之選

珞得寧波黜賊吏抑豪強發奸摘伏老吏懾服禁絕軍民邏捕之擾盜亦屏息條減織染弓張二局及諸色歲辦節物力汰浮羨修舉學校廣厲生徒每蒞政畢輒至明倫堂與諸生質難可否布衣之士識治理者亦延訪之中官裴可烈以公事至郡貪暴不法珞上其罪詔置可烈於法以艱去會海寇入犯民數千詣闕乞留奪情復任珞辭不允尋擢浙江參政未上卒

潘貴永樂中任德安典史德安不習紡績而夏稅有苧布買於他縣不勝其困貴請於朝改輸棉民以爲便

孫珏字士節宣德間以貢入太學與修五經四書大全書成擢常山知縣調鉛山清勤慈惠民懷之秩滿民赴闕乞留遂得再任前後幾二十年

林壤字叔載正統戊午舉人除順天府霸州知州州盜剽掠商旅爲患已久壤廉其尤者置之法盜爲衰息北地多荒蕪壤教民墾闢量戶給地察其勤惰而勸懲之踰年田野大治

鄭元韶字志夔嘉靖己酉舉人知善化縣遷松江府同知會巡撫都御史林潤奏請履畝均糧元韶以薦假湖廣按察司僉事銜賜勅專理徧歷阡陌書其步積之數量腴瘠分上中下以定賦復請以五年一編徭役著爲令自是每戶一年力役得五載休息焉

施可材官定安典史隆慶六年漳州寇莊猷引倭數百渡海夜劫定安可材親率民壯捍禦操巨斧斬其酋賊乃退駐大底可材與知縣謝應元日巡夜守邑人程大度出蓄儲以資禦倭知有備乃去

陳一新字惺初侯官人崇禎乙亥歲貢授遂昌訓導以薦辟知雲南定遠縣有黑琅二井俱屬內界居民向食餘鹽時奉有計口食鹽之令一新極力請蠲土司負隅害民以計擒治有婦朱氏前令以謀殺夫擬磔一新詳鞫得情白其冤眾服其明

朱鐔字子珍崇禎末任敘州府高縣典史高本夜郎地邇獠芒烏撒諸郡蠻習頑梗鐔尙寬大示禮法始就繩束自以早失怙刊行孝弟歌諭民知

愛敬有古循吏風

林桐字正行父宗與字受之邃於易參究揚子太玄明初海內未靖宗與卜未可仕葺通玄堂爲隱居所自號卧玄子桐洪武中舉明經擢第一授順昌訓導改貴溪典史鋤强暴抑兼并盜賊屏息永樂中移天台薦修大典書成擢兵科給事中會台州民台疏乞還治郡帝疑爲黨除籍罰充吏尋起吉安推官緝捕劇惡人稱神明暇則與士人講授經義討論正學士民戴之宣德初召補文選司郎中第植字正立以薦授常山縣丞縣苦征役多逋負植多方招徠約停民宿逋而課之耕種貧者給牛種再踰年歲大獲輸稅者爭先逋負以清丁母憂民歛金爲賻植取一金祝而投之水曰是卽吾受也除服補浮梁

李興字希傑永樂初由國子生授太平府推官用薦擢戶部郎中遷嚴州府知府東吏特嚴而撫民以寬興除悉準人情設量衡於市平準交易催徵慶緩急預揭爲期民莫敢後宣德初移廣州府治如嚴州秩滿去行李

蕭然

陳復字鼎初永樂甲辰進士授行在戶部主事正統間擢杭州知府廉靜無苛獄訟大省朔望必召耆老言利弊而興革之餘日端坐堂皇與曹掾講讀律令愼職而已同官左布政孫原貞按察使軒輓仁和知縣許璞皆極一時之選復卒於官杭民罷市巷哭輓倡屬助之乃克斂吏民相率致賻其子盡卻之

陳崇字德崇成化戊戌進士知樂平縣俗生女多不舉婚多違禮崇嚴爲禁革著厚倫正俗二文示之俗稍變擢御史巡按應天發奸摘伏人稱神明性醞謹遇事剛果不避難同列彭程以言事繫獄獨崇具疏論救時論趨焉

阮時懋字勉夫成化丙午舉人授訓導擢慶遠府宜山縣鋤強發奸人稱鐵阮就轉府通判慶遠苦洞夷出掠郡人聞時懋至曰是鐵宜山也無患賊矣時懋爲設方略守禦又請於上官築四關土垣慶遠以安遷思明同

知未任卒孫北字維拱嘉靖舉人終安仁知縣

王介字節父弘治壬子舉人授婺源訓導擢湖廣咸寧知縣詢民利害以丁產定賦額出贖緩易穀萬石正德四年歲饑賴以全活移知江夏遷廣州府通判轉全州知州州人光祿寺丞唐夔倚姻蔣冕爲大學士橫於鄉里介裁抑之被構改武定軍民府同知介剛正有爲尹二縣民號爲鐵尹其判廣州有金玉滿萬難得府判之謠末期罷歸無擔石儲

廖雲翔字鳴和弘治壬子舉人正德中官奉化知縣持身廉介不以家累自隨視民如子未嘗妄鞭扑一人嘗有貧民負官錢以其俸資代之先是邑令謁鎮守市舶內臣率賄左右乃得通雲翔不可曰一錢尺帛皆民脂也竟不與通

王希周字文浩嘉靖己酉舉人授瑞安教諭捐資振士之貧乏者擢和平知縣至官僅三月有鄰邑人宿東壩張德傑家通判黃佳枉以爲窩盜縱牙爪捕之德傑被逼而死佳因言東壩民盡窩盜欲屠之促知縣同舉希